



Na osnovu člana 19. stav 1. tačka 6. Zakona o rudarstvu Federacije Bosne i Hercegovine („Službene novine Federacije BiH“, broj 26/10), federalni ministar energije, rudarstva i industrije donosi

PRAVILNIK
za provođenje tehničkih mjera i mjera zaštite za skladištenje i trošenje
sekundarnih ili trenutno otpadnih sirovina u rudarstvu i korisnih mineralnih
sirovina dobijenih kroz istražne radove

I OPŠTE ODREDBE

Član 1.

Ovim Pravilnikom se propisuju tehničke mjere i mjere zaštite za skladištenje i trošenje sekundarnih ili trenutno otpadnih sirovina u rudarstvu i korisnih mineralnih sirovina dobijenih kroz istražne radove, i to za:

- sekundarne mineralne sirovine sadržane u jalovini nastaloj kao produkt klasiranja, separisanja ili oplemenjivanja rovnog uglja, metaličnih i drugih mineralnih sirovina i
- korisne mineralne sirovine dobijene kroz istražne radove u fazi istraživanja ležišta.

II ODLAGANJE I KORIŠTENJE SEKUNDARNIH I KORISNIH MINERALNIH
SIROVINA DOBIJENIH KROZ ISTRAŽNE RADOVE

Član 2.

Sekundarne mineralne sirovine nastale kao produkt klasiranja, separisanja ili oplemenjivanja rovnog uglja su sastavni dio separacijske jalovine i čine njen manjinski dio.

Sekundarne mineralne sirovine iz stava 1. ovog člana odlažu se na posebne lokacije u skladu sa važećom projektnom dokumentacijom rudnika, dozvolama i tehničkim propisima kojim je uređena oblast odlaganja jalovine.

Rudnici koji imaju i površinsku eksploataciju sirovine iz stava 1. ovog člana mogu odlagati i na odlagalište jalovinskih masa u skladu sa važećom projektnom dokumentacijom i važećim dozvolama.

Član 3.

Sekundarne mineralne sirovine nastale kao produkt prerade, separisanja i oplemenjivanja metaličnih mineralnih sirovina su sastavni dio separacijske jalovine.

U sekundarne metalne sirovine u rudarstvu ubraja se i metalurški otpad koji je nusprodukt metalurške prerade metalnih ruda.

Sekundarne mineralne sirovine iz stava 1. ovog člana odlažu se na posebne lokacije u skladu sa važećom projektnom dokumentacijom, dozvolama i tehničkim propisima kojim je uređena oblast odlaganja jalovine.

Rudnici koji imaju i površinsku eksploataciju metalnih mineralnih sirovina iz stava 1. ovog člana mogu odlagati i na odlagalište jalovinskih masa u skladu sa važećom projektnom dokumentacijom i važećim dozvolama.

Član 4.

Sekundarne mineralne sirovine nastale kao produkt klasiranja, separisanja i oplemenjivanja nemetalnih mineralnih sirovina su sastavni dio separacijske jalovine i čine njen manjinski dio.

Sekundarne mineralne sirovine iz stava 1. ovog člana odlažu se na posebne lokacije u skladu sa važećom projektnom dokumentacijom rudnika, dozvolama i propisima kojim je uređena oblast odlaganja jalovine.

Član 5.

Korisne prerađene i neprerađene mineralne sirovine koje su iskopane u fazi istraživanja ležišta odlažu se na lokacije i na način u skladu sa važećim istražnim pravom i projektom geoloških istraživanja.

Član 6.

Posebne mjere zaštite kod odlaganja sekundarnih sirovina separacijske i druge jalovine nastale kao produkt prerade i oplemenjivanja rovnog uglja, metalnih mineralnih sirovina i drugih mineralnih sirovina su:

- zaštita od samoupale uglja sadržanog u odloženoj jalovini;
- zaštita od nastajanja klizišta odlagališta;
- zaštita od onečišćenja izvorišta, vodotokova u bližoj okolini odlagališta kao i zaštita cjelokupnog susjednog okoliša i
- zaštita od nelegalne eksploatacije.

Navedene mjere zaštite se propisuju obaveznom projektnom dokumentacijom i važećim dozvolama.

Član 7.

O količinama korisnih mineralnih sirovina koje su iskopane u fazi istraživanja privredno društvo koje ima istražno pravo je dužno u skladu sa istražnim pravom i važećim propisima voditi preciznu evidenciju.

Odlaganje - skladištenje korisnih mineralnih sirovina koje su iskopane u fazi istraživanja obavezno je vršiti u skladu sa odobrenom projektnom dokumentacijom i važećim dozvolama.

Član 8.

Eksploatacija, radi dobivanja mineralnih sirovina i korištenja sa odlagališta iz čl. 1., 2., 3., 4. i 5. ovog Pravilnika, može se vršiti u skladu sa odredbama Zakona o rudarstvu Federacije Bosne i Hercegovine („Službene novine Federacije BiH“, broj 26/10) i Zakona o geološkim istraživanjima Federacije Bosne i Hercegovine

(„Službene novine Federacije BiH“ broj 9/10 i 14/10) kojima je propisan tretman sekundarnih mineralnih sirovina i ležišta.

III ZAVRŠNE ODREDBE

Član 9.

Ovaj Pravilnik stupa na snagu osmog dana od dana objavljivanja u „Službenim novinama Federacije BiH“.

Broj: 06-34-2151/10
24.aprila 2012. godine
Mostar

M i n i s t a r
Erdal Trhulj s.r.